

TEZAUUR LITURGIC
20 FEBRUARIE

ACATISTUL
SF. CNEAZ
IAROSLAV-
GHEORGHE
MUDROM
DE LA KIEV

I



MOSCOVA, 2000



Акафист

святому благоверному князю

Ярославу Мудрому

Кондак 1

Избранный от Предвечнаго Царя Небеснаго и Церкви Зиждителя, данный стране нашей ходатаю изрядный и заступниче пречудный, святой княже Ярославе, прими похвальная пения любовью чтущих святую память твою и моли Христа Бога сохранитися неврежденным нам от враг видимых и невидимых, да со умилением вопием ти: Радуйся, святой благоверный великий княже Ярославе.

Икос 1

Ангельское житие возлюбив от юности и ко исканию единого на потребу направив помыслы твоя, княже Ярославе, дивный образ был еси добродетелей христианских и совершенства духовнаго; темже и возвеличен был еси на земли пред братиею твоею и на небеси прославлен еси от Господа. Мы же, благодаряще Творца и Спаса

нашего, славословим тя, яко великаго избранника Божия, со умилением зовуще:

Радуйся, земли Русския княже богоизбранный.

Радуйся, пречестная отрасль равноапостольнаго князя Владимира.

Радуйся, благоверия предков наследниче.

Радуйся, мудрости Соломоновы подражателю.

Радуйся, всем житием своим Богу послуживый.

Радуйся, всех концов земли Русския покровителю.

Радуйся, заповедей Христовых верный исполнителю.

Радуйся, дивный хранителю, от Бога всем нам дарованный.

Радуйся, святой благоверный великий княже Ярославе.

Кондак 2

Видевше еще отрок сый, прехвальне Ярославе, отца твоего от злых дел к благим деяниям изшедшаго и Светом Христовым озареннаго, купно с братьями твоими святое

крещение восприял еси и сердцем твоим богопросвещенным благодарственно воспел еси Господеви: Аллилуиа.

Икос 2

Разум твой, угодниче Христов, духовным ведением Милосердный Господь озари, яко ты, житие богоугодное возлюбив и благочестивым родителем твоим внимающе, в страхе Божии, молитве и добродетелех возрастал еси. Сего ради, Господь, видя верность твою в малом, над многими тя постави, мы же с любовью взываем ти сице:

Радуйся, в истинах христианских измлада наставленный.

Радуйся, от юности Господа всем сердцем возлюбивый.

Радуйся, во испытаниих многих Богом дивно хранимый.

Радуйся, подвиги мужества, яко добрый воин, во брани явивый.

Радуйся, водительству Духа Святаго издетска прилежавый.

Радуйся, добродетелем преславных предков твоих подражавый.

Радуйся, благодатныя дары Всесвятаго Утешителя Духа стяжавый.

Радуйся, и нас даром мудрости обогащающий.

Радуйся, святыи благоверный великий княже Ярославе.

Кондак 3

Силою Вышняго укрепляемый, блаженне Ярославе, в кротости и в смирении души твоя возрастал еси, уготоваля себе на служение княжеское, и о помощи небесней молился еси, взывая Богу: Аллилуиа.

Икос 3

Имея страх Божий в сердце твоём, благоверный княже Ярославе, послушание явил еси отцу твоему Владимиру и, по воли его, от великаго Киева в пределы земли Ростовския княжити прешел еси, идеже жителей в вере в Бога истиннаго утвердил еси и храм великаго пророка Илии тамо воздвигл еси, сим показуяй велию любовь твою ко Господу и святым Его, и подвизаяй нас хвалебно взывати к тебе:

Радуйся, лампадо веры Православныя неугасимая.

Радуйся, к ближним своим любви преизобильная.

Радуйся, неутешных в скорбех утешение.

Радуйся, блаженный храмоздателю.

Радуйся, благолепия церковного любителю.

Радуйся, зло творящих вразумление.

Радуйся, Правды Христовы ревнителю.

Радуйся, Отечества Небеснаго любителю.

Радуйся, святой благоверный великий княже Ярославле.

Кондак 4

Буря вражды братоубийственныя сотрясе землю Русскую, егда Святополк Окаянный, властолюбием ослепленный, повеле убити братья твоих возлюбленных Бориса и Глеба; ты же, блаженне Ярославле, скорбя о смерти их, на Господа упование и надежду возложил еси и Его силою правду на Руси утвердил еси, воспевая выну: Аллилуиа.

Икос 4

Слышавше о премногих скорбех, претерпенных тобою, святой благоверный

княже Ярославе, от Святополка Окаяннаго, величаем выну укрепившаго тя Господа, сохранявшаго тя, егда понужден быв пределы Киевския покинути и преселитися в пределы Новгородския, из нихже с вои своими паки в землю отеческую пришедши, правду Божию утвердил еси. Мы же, вере и мужеству твоему подражая, взываем сице:

Радуйся, пресельник в земли твоей бывый.

Радуйся, горняго града выну усердно взыскавый.

Радуйся, мудрый странниче, на путь спасения стопы твоя направивый.

Радуйся, Божий избранниче, скорби многия претерпевый.

Радуйся, кротко и мирно в Великий Новгород княжити возвративыйся.

Радуйся, богоугодно и праведно тамо княживый.

Радуйся, иго Христова всем сердцем возлюбивый.

Радуйся, всем сердцем его приявый.

Радуйся, святой благоверный великий княже Ярославе.

Кондак 5

Боготечною звездою воссиял еси дела твоими богоугодными, княже Ярославе, и ныне предстоиши престолу Вседержителя; сего ради молим тя: купно со святыми сродники твоими сотвори молитву Царю царствующих да, вашего ради соборнаго предстательства, пробавит милосердие Свое народам словенским, и утвердит ны в вере Православней, вопиющих Ему ныне: Аллилуиа.

Икос 5

Видевше житие твое праведное, людие русстии славляху тя, своего правителя милостиваго, благоверне Ярославе; ты же похвалы человеческия ни во чтоже вменяя, гордынею неуязвлен пребыл еси, показуя всем образ истиннаго смирения, емуже поучаяся, с любовью вопием ти таковая:

Радуйся, исполнителю правды евангельския.

Радуйся, образе нищеты духовныя.

Радуйся, добродетелей пребогатое сокровище.

Радуйся, благочестивых великая славо.

Радуйся, вдов и сирот питателю.

Радуйся, скорбных сердец утешителю.

Радуйся, яко послужил еси Господеви всяким благоугождением.

Радуйся, яко за нас ходатайствуеши пред Ним своим заступлением.

Радуйся, святой благоверный великий княже Ярославе.

Кондак 6

Проповедником добродетелей христианских явился еси, преблаженне княже Ярославе: ты бо, ревнуя о благочестии не словом токмо, но всем житием своим, церкви возводил и украшал еси, людем был еси милостивый заступник и попечитель. Сего ради и мы, грешнии, надеющиеся на твое милосердное о нас попечение, усердно прибегаем к твоему заступлению, взывающе благодарно Богу: Аллилуиа.

Икос 6

Возсиял еси в стране нашей светом добрых дел твоих, святой Ярославе, и на свещнице Церкви Православныя поставлен был еси, да светиши Отечеству твоему земному и

приводиши к Солнцу Правды люди русския, со упованием таковыя похвалы тебе возносящия:

Радуйся, верный Христов последователю.

Радуйся, Отечества Небеснаго усердный взыскателю.

Радуйся, руце твои на рало Господне возложивый.

Радуйся, вспять лица твоего николиже обративый.

Радуйся, Евангелия Царствия Божия проповедниче благогласный.

Радуйся, богомудрыми твоими словесы многи в разуме просвещаяй.

Радуйся, любящим и чтущим тя ходатаю вечнаго спасения.

Радуйся, вразумителю грешных ко исправлению.

Радуйся, святой благоверный великий княже Ярославе.

Кондак 7

Хотяй прославити Божественнаго Искупителя нашего и Его Пречистую Матерь, повелел еси, всемудре Ярославе, воздвигнути в стольном

граде Киеве Врата Златыя, ихже венчал еси храмом Благовещения Пресвятыя Богородицы, да всякий пребывающий во граде сем, под благодатным покровом Царицы Небесе и земли пребывает и радости духовныя о сем да исполняется, непрестанно воспевая: Аллилуиа.

Икос 7

Новый Иустиниан великий воистину явился еси, богомудре княже Ярославе, яко храм великий и преславный в честь Святыя Софии – Ипостасныя Премудрости Божия создал еси, и законам справедливым и судам милосердным основание в державе твоей положил еси, благочестие христианское и научение книжное насаждая. Сего ради молим тя: настави всех нас, чтущих святую память твою, быти наследниками дел благих твоих и добродетелем твоим богоугодным последовати, воспевающих ти похвалы сия:

Радуйся, душеполезных знаний
преизобильное излияние.

Радуйся, душевреднаго мрака светлое
озарение.

Радуйся, неверных смыслов милостивое просвещение.

Радуйся, неправо мудрствующих внезапное низвержение.

Радуйся, верных незыблемое уверение.

Радуйся, отъемлющий духовное помрачение.

Радуйся, миром и любовью души наши наполняющий.

Радуйся, наветов вражиих мудрый разорителю.

Радуйся, святой благоверный великий княже Ярославе.

Кондак 8

Странника и пришельца себе на земли быти помышляя, блаженне Ярославе, не ведал еси покоя в трудах твоих, люди твоя во благочестии утверждая и державу твою миром ограждая; сего ради, ныне в лике святых благоверных князей пребываеши, веселяся купно с ними и поя Богу: Аллилуиа.

Икос 8

Всею душею Господеви послуживши и всем житием своим Ему благоугодив, прославился еси

благочестием, великий княже, и, ко блаженному успению достигши, в мире дух свой Богу предал еси. Мы же, поминающе праведное житие твое и блаженное упокоение, вопием ти:

Радуйся, храмы Божиими грады многия украсивый.

Радуйся, величию земли Русския тем послуживый.

Радуйся, во всем житии твоём вере Христовой поревновавый.

Радуйся, крепость державы твоя тем созидавый.

Радуйся, в народоправлении велию мудрость проявивый.

Радуйся, о благе народа своего усердно пекийся.

Радуйся, общаго мира в пределах страны твоя устроителю.

Радуйся, людем твоим помощниче благодарованный.

Радуйся, святыи благоверный великий княже Ярославe.

Кондак 9

Весь еси в вышних, богоблаженне княже Ярославе, во обителях райских водворившись, обаче и нас, тебе тепле почитающих, не оставляеши, наставляя к разуму Божественному и деланию усердному заповедей Христовых. и всякия благополезныя прошения наша исполняеши, подвизая нас Отцу Небесному благодарственно воспевати: Аллилуиа.

Икос 9

Ветия многовещанная и риторы искусныя не возмогут по достоянию воспети подвиги твоя, недоумеют бо изрещи достойныя тебе похвалы, княже праведный. Мы же, во всех трудех и подвизах благодать Божию в тебе видяще и, на предстательство твое уповая, взываем ти сие:

Радуйся, лучу светозарнаго солнца Христа, земли Русстей сияющий.

Радуйся, в молитвах о нас ко Господу неумолкающий.

Радуйся, за отечество твое пред Господем милостивый печальниче.

Радуйся, хриstopодражательнаго жития на земли наставниче.

Радуйся, столпе правоверия Божия непоколебимый.

Радуйся, истины поборниче непреодолимый.

Радуйся, утешение скорбящих и крепкая ограда обидимым.

Радуйся, защищение твердое и отрадо всем ненавидимым.

Радуйся, святой благоверный великий княже Ярославе.

Кондак 10

Спасительная наставления сыновом и народу твоему оставил еси, богомудрый княже, глаголя: «Любите друг друга; аще будете жити в любви между собою, то Бог пребудет с вами и покорит вам враги ваша». Сия убо поминающе, просим тя: моли тобою чудодействующаго Бога, да и мы возможем в любви со всеми пребывати и спасения вечнаго достигнути ходатайством твоим, во веки благодарственно воспевающе: Аллилуиа.

Икос 10

Царя Небеснаго верный раб и изрядный угодник был еси, благоверный великий княже

Ярославе; сего ради благоразумия крилами украшаем, легко прелетел еси вся сети вражия. Мы же, дивящися высоте твоего добродетельнаго жительства, с любовью и усердием сице тебе поем:

Радуйся, великий угодниче Божий, жизнь земную свято и праведно скончавый.

Радуйся, пришедый от скорбей многих в покой вечный.

Радуйся, увенчанный от Христа венцем нетленных славы.

Радуйся, и по смерти заступлением твоим нас не оставляяй.

Радуйся, заповеди Господни творити нас научаяй.

Радуйся, окамененныя сердца во источницы милования обращааяй.

Радуйся, отступивших от правыя веры на путь спасения возвращаяй.

Радуйся, блуждающих по морю жития сего мудре окормляяй.

Радуйся, святыи благоверный великий княже Ярославе.

Кондак 11

Пение молебное прими от нас, святой благоверный княже Ярославе, и молитву твою вознеси о нас, чтущих святую память твою, ко Престолу Вседержителя, да радуешься о твоём прославлении на небеси и на земли, и о твоём всегдашнем предстательстве, благодарственно вопиём святых Святейшему Отцу Небесному: Аллилуиа.

Икос 11

Светозарное светило, лучами христианских добродетелей сияющее, явился еси, небо церковное украшая, богомудре Ярославе, и всем, блуждающим во тьме неверия, сомнения, маловерия и нечестия, луч надежды на спасение подавая и к Солнцу Правды Христу Иисусу путеводяй, да во свете заповедей Его со всеми верными шествуя, радостно тебе воспоют:

Радуйся, душевными твоими очима выну Господа созерцавый.

Радуйся, пред Оним, яко сын пред Отцем, яко ученик пред Учителем шествовавый.

Радуйся, во вся дни живота твоего Его искавый и в Нем намерение полагавый.

Радуйся, блистанием добродетелей на земли
светло сиявый.

Радуйся, от Господа на небеси венец
нетленный приявый.

Радуйся, яко тобою различных искушений
избегаем.

Радуйся, яко предстательством твоим
благодатную помощь обретаем.

Радуйся, яко тебе призывающия скоро
предваряеши.

Радуйся, яко любящих тя от различных бед и
напастей изымаеши.

Радуйся, святой благоверный великий княже
Ярославе.

Кондак 12

Благодатию Божиею в непрестанном
творении заповедей Христовых обогативыйся,
по отшествии же твоём от земных наипаче к
трисолнечному престолу Пресвятая Троицы
приблизися, но и от народа твоего духом любви
твоея не отступивый; сего ради молим тя:
пролей теплую твою молитву ко Господу, да
сохранит Церковь Свою Святую неврежденну от

ересей и расколов и вся чада ея да помилует и спасет, вопиющая Ему: Аллилуиа.

Икос 12

Поюще добродетели и чудеса твоя, благоверный княже, купно же велия твоя труды и подвиги, во благоустроение державы нашея тобою подъятыя, усердно благодарим и восхваляем тя, с любовию зовуще:

Радуйся, великий княже Ярославе, Престолу Царя Небеснаго предстояй.

Радуйся, хвалу немолчную Пресвятей Троице возносяй.

Радуйся, жизнь вечную в Царствии Небеснем получивый.

Радуйся, яко дивный образ любви Отца Небеснаго в себе явивый.

Радуйся, безпомощным скорый помощниче.

Радуйся, о спасении грешных теплый молитвенниче.

Радуйся, яко молитвам твоим Господь благоутробно внемлет.

Радуйся, угодников Божиих сонаследниче.

Радуйся, святой благоверный великий княже Ярославe.

Кондак 13

О преславный угодниче Христов, великий княже Ярославe, вонми гласу моления нашего и ходатайством твоим испроси нам от Господа в жизни сей в вере и добродетелех утверждение, от ересей и расколов сохранение, от скорбей и напастей избавление, прегрешений наших прощение и в час смертный твердое спасения упование, да сподобимся Царствие Небесное наследовати и вечно воспевати Богу: Аллилуиа.

(Этот кондак читается трижды, затем икос 1 и кондак 1)



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**